



Komunikadu Imprensa
15 Dezembru 2020
Parlamentu Nasionál

**JSMP husu atu Governu bele ezejuta orsamentu 2021 ho
transparénsia no akontabilidade**

Parlamentu Nasionál, liuhusi reuniuan plenária Parlamentu Nasionál hahú husi loron 10 to'o 12 Dezembru 2020 aprova ona Proposta Lei Nú.23/V(3ª) kona-ba Orsamentu Jerál Estadu (OJE) ba tinan 2021 ho votu afavór 44, kontra 0 no abstain 0. Montante totál OJE 2021 ne'ebé aprova ne'e hamutuk billiaun US\$1,895,000,000.00. Totál orsamentu ne'e inklui ho orsamentu impréstimu no doasaun husi parseiru dezenvolvimentu sira.

Programa prióridade iha OJE 2021 ne'e mak dezenvolvimentu iha kapitál sosiál, dezenvolvimentu ekonómiku, ne'ebé aliña ho medida sira ne'ebé inklui ona iha Planu Rekuperasaun Ekonómika, dezenvolve infraestrutura bázika fundamentál sira, dezenvolvimentu ambientál no dezenvolve serbisu reforma institusionál.

“JSMP apresia esforsu no serbisu Parlamentu Nasionál hodi finaliza no aprova OJE 2021 tuir tempu. Nune'e, JSMP husu atu Governu ho kolaborasaun parte hothotu nian bele halo planu ne'ebé di'ak no apropriadu atu bele ezejuta orsamentu ne'e tuir mekanizmu legál ne'ebé prevee ona iha Lei OJE 2021 no lei relevante sira seluk iha implementasaun programa prioritáriu sira hodi asegura transparénsia no akontabilidade. Aleinde ne'e, bele responde ho di'ak no efetivu ba nesesidade povu no nasaun nian, liu-liu bele normaliza fali situasaun ekonómika iha rai laran ne'ebé afetadu gravemente husi pandemia Covid-19”, dehan Diretora Ezekutiva JSMP, Sra. Ana Paula Marçal.

Iha parte seluk, JSMP mós husu atu Parlamentu Nasionál kontinua ativu iha hala'o nia fiskalizasaun ba ezejusaun OJE 2021 inklui entidade relevante sira seluk hanesan Komisaun Anti Korrupsaun (KAK), sosiedade sivíl no entidade hotu atu hola papél iha serbisu auditoria sosiál hodi asegura transparénsia no akontabilidade.

Ámbitu OJE 2021 iha previzaun ba órgaun serbisu setór públiku administrativu sira ne'ebé kompostu husi Administrasaun Sentrá, Rejiaun Administrativu Espesiál Oekussi-Ambeno no Orsamentu Seguransa Sosiál.

Aleinde ne'e, iha orsamentu ne'e deskreve mós despeza planeadu sira husi entidade Estadu oinoin nian hamutuk 91 ne'ebé kompostu husi Ministériu, Sekretária Estadu no Instituisaun Públika Estadu sira nian ho nia atividade hamutuk 1.800 resin ne'ebé la hanesan hodi orsamenta ona iha Lei OJE 2021.

Atu hetan informasaun liutan favór kontaktu:

Ana Paula Marçal
Diretóra Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPTl